

100 onns Republica finlandaisa

In giubileum bain merità

DA GUIU SOBIELA-CAANITZ

■ **Ils 6 da december 1917 ha il parlament dal gronducadi da Finlanda declerà l'indipendenza dal pajais. «La Liberté» (Friburg) dal prim da december ha publictà in'intervista cun l'istoricher Kimmo Rentola (Universitad da Helsinki), specialist da las relaziuns da la Finlanda cun il vast imperi limi-trof. Tge status aveva il gronducadi il 1917? Rentola: «El era gia in stadi auton-om, cun sia atgna administraziun, ses senat, sia lingua; il russ n'è mai stà ses lin-**

guatg uffizial. Il gronducadi aveva perfin cunfins e dazis encunter la Russia. Ils Finlandais n'avevan ni diplomazia ni arma-da, ma eran [l'emprim] vaira cuntents cun la situaziun. Quai è sa midà a la fin dal 19avel tshientaner, cur che la Russia ha pruva d'assimilar il pajais. Lur è l'idea d'indipendenza sa rinforzada, ma las gruppas uscheditgas responsablas ed ils acturs da la vita economica na pensavan betg ch'ins possia s'emancipar da la Rus-sia uschè pussanta (...). Plis eveniments èn vegnids dentant in suenter l'auter. Ils emprims èn stads il collaps da l'imperi

dals zars ed il triumf dals bolschevists, ils unics che levan acceptar l'indipendenza [da la Finlanda]. Cun il patg da Brest [1918] è lezza vegnida part da la sfera d'acziun tudestga; quai ha pussibilità la victoria dals 'alvs' [aderents da l'indepen-denza] en la guerra civila (...). Er ils pajais da l'occident han gidà la Finlanda cun pretender elecziuns democraticas.» L'istoricher Eino Jutikkala (1907–2006) scriva: «Suenter las elecziuns han la Gronda Britannia ed ils Stadis unids ren-conuschì l'indipendenza finlandaisa»*.

La sfida da la Segunda Guerra mundiala

L'avust 1939 ha la part zuppada dal patg cun la Germania lubì a l'Uniun sovietica (URSS) da laschar valair sia preponde-ranza en Finlanda. Rentola: «L'URSS le-va restaurar la pussanza russa. Ma quai n'è betg reussì. Ins manegia che la Finlan-da haja cumbattì suletta. Quai constava sin la front, ma ins ha pli tard scuvert che Stalin aveva acceptà l'armistizi [cun la Finlanda 1940] perquai ch'el temeva bumbardaments britannics e franzos sin ses petroli e gas natural en Aserbaigian (...). L'istorgia ha mussà ch'ins sto adina mantegnair il contact cun ils Russ, siond ch'i èn adina qua (...). Ils Finlandais na teman betg ils Russ.» La Finlanda ha in cunfin da 1313 km cun la Russia, ma na fa betg part da l'alleanza atlantica (Nato). La Norvegia percenter, independenta dapi 1905, è commembra da la Nato cun mo 167 km d'in tal cunfin; ma ella pos-seda il vast Svalbard arctic, da manivel da las inslas russas numnadas «Semlja Franza-Josifa». 90% da la populaziun finlandaisa èn da lingua finnaisa, paren-ta lontana da l'ungarais, e 5% da lingua svedaisa, cunzunt en lieus sper la mar. Var 1800 persunas discurran in dals quatter idioms «samis» dal pajais sper il cunfin cun la Norvegia; era lezs èn pa-rents lontans da l'ungarais.



* Eino Jutikkala, *Geschichte Finnlands*. Stuttgart (Alfred Kröner) 1964, p. 362.